

U sukobima u Siriji poginulo 59 ljudi

1 februar 2012 Izmijenjeno 18:55 CET

Najmanje 59 lica, uglavnom civila, ubijeno je u srijedu u provinciji Damask u sukobu snaga sigurnosti i pobunjenika



Dok civili u Siriji ginu, u Vijeću sigurnosti UN-a se vodi diplomatska bitka [AFP]

U žestokim sukobima u Homsu, u centru Sirije, Damasku i Idlibu, na sjeverozapadu zemlje, poginulo je najmanje 59 ljudi, uglavnom civila, saopćila je sirijska Organizacija za ljudska prava. "Sirijske snage su ubile najmanje osam civila u nekoliko dijelova Homsa", navela je organizacija za praćenje ljudskih prava u Siriji, sa sjedištem u Londonu.



Jaafari odbacio rezoluciju VS-a [AFP]

U području Damaska je ubijeno 24 ljudi, među kojima žena i dijete, pet civila je izgubilo život u napadima u provinciji Dara, a jedan čovjek je ubijen iz snajperske puške u Idlibu, na sjeverozapadu zemlje. Među žrtvama sukoba u srijedu su i šesterica pobunjenika, koji su poginuli kod Damaska, kao i 15 vojnika, koji su ubijeni u sukobu s pobunjeničkim snagama blizu Homsa, prenosi AFP.

Rasprava u Vijeću sigurnosti

Članice Vijeća sigurnosti Ujedinjenih naroda (UN) u utorak su počele raspravu o sigurnosnoj situaciji u Siriji, a predstavnici zapadnih i arapskih zemalja još jednom su ukazali na neophodnost usvajanja rezolucije kojom se sirijski predsjednik poziva da preda vlast i okonča nasilje.

Nacrtom rezolucije predviđeno je da Bashar al-Assad prekine nasilje i da primijeni mirovni plan Arapske lige (AL), kojim se on poziva da preda vlast potpredsjedniku.

Ambasador Sirije pri UN-u Bashar Jaafari odbacio je rezoluciju Vijeća sigurnosti UN-a.

Ukoliko to ne učini u roku od 15 dana, Vijeće sigurnosti UN-a će razmotriti "dalje mjere".

Ambasador Sirije pri UN-u Bashar Jaafari odbacio je rezoluciju Vijeća sigurnosti i poručio tom tijelu da će se Damask suprotstaviti svojim neprijateljima.

Moskva ulaže veto

Ruski ambasador pri UN-u Vitalij Čurkin u srijedu je upozorio kako će Rusija uložiti veto na bilo kakav prijedlog rezolucije Vijeća sigurnosti o Siriji, koji ocijeni "neprihvatljivim", dodavši kako će se pregovori nastaviti. "Ako tekst bude neprihvatljiv, glasat ćemo protiv", rekao je, kako prenose ruske agencije, a svako negativno glasanje Rusije u Vijeću sigurnosti jednako je pribjegavanju pravu te zemlje na ulaganje veta.



Čurkin najavio glasanje protiv prijedloga rezolucije [AFP]

"Nećemo dopustiti prolaz bilo kakvog teksta koji smatramo neprihvatljivim ili teksta koji bi doveo do pogoršanja sukoba. Nećemo dopustiti da se takav tekst usvoji i to ćemo jasno kazati svojim kolegama", kazao je Čurkin. Nekoliko sati ranije, zamjenik ruskoga ministra vanjskih poslova Genadij Gatilov je izjavio kako će se u UN-u nastaviti rasprava te da se u danima koji predstoje neće održati nikakvo glasanje.

Šef francuske diplomatije Alain Juppe u srijedu je izjavio kako je zamijetio "nešto manje negativan" ruski stav tokom sastanka u Vijeću sigurnosti, istaknuvši kako je do sada u krizi u Siriji smrtno stradalo oko 6.000 ljudi.

Izvor: Al Jazeera